

## SA LETA KEKENU TE ZONE

### **Sa Vinabakala**

Sa *Leta Kekenu te Zone* hie, si karua sari na nati binalabala vasina. (1) Pude va ninira i si arini pu tirona sa leta hie koasa dia tinoā binaere koe Tamasa meke sa Tuna, se Zisu Karisito. (2) Pude va balau i si arini pu tirona sa leta hie pude lopu ta turanā va seu koari na vina tumatumae seadi. Zama sari na tie va tumatumae kokohadi hire sapu guahe: Be koa pa kasia popoa sa tie, si va bonia sa kasia popoa sa nana tinoā. Gua asa ke Zisu Karisito, sapu sa Tuna Tamasa si lopu toa nia sa tinoā pa tini, sina loke nana sinea. Tozia tugo rini, sapu be hiva ta harupu si keke tie, si kaqu va ilolo pule nia koasa binalabalana sa tinoā pa kasia popoa hie, meke sa tinaharupu si loke nana ginugua la gua pa kinopuna sa Tinarae te Tamasa, meke na tataru koa rina turanana, gua si arini.

Pa nana vinaripera koari na vina tumatumae seadi arini, si zama va bakala nia Zone, sapu se Zisu Karisito si na tie hinokara. Zama va ninira nia sa sapu arini pu va hinokaria se Zisu, meke tataru nia sa Tamasa, si kaqu koa varivari tatarue tugo teledia! gua.

### **Sari na Nati Pinaqapaqahana sa Leta**

Sari na zinama kekenu. Hinia 1:1-4

Sa kalalasa meke sa hinuporo. Hinia 1:5 kamo hinia 2:29

Sari na koburu te Tamasa, meke sari na koburu te Setani. Hinia 3:1-24

Sa hinokara meke sa kinohakoha. Hinia 4:1-6  
 Sa tinavete tataru. Hinia 4:7-21  
 Sa rinanerane sapu kote tagoa sa minataqara.  
 Hinia 5:1-21

### *Sa Zinama Tinoia*

<sup>1</sup> Kubere atu nia gami sa Zinama Tinoia sapu koa pa pinodalaena, sapu se Zisu Karisito, sapu ele avosia gami, meke ele dogoria gami pa mata mami soti. Hinokara, ele dogoro sotia, na tiqua gami pa lima mami soti si Asa.\*

<sup>2</sup> Totoso vata dogoro vura sa Tinoia hie, si dogoro sotia gami; gua asa ke tozia gami koa gamu sa guguana sa Tinoia Hola sapu ele koa pa pinodalaena koe Tamasa, meke tava gilana koa gami.\*

<sup>3</sup> Gua sapu ele dogoria na avosia gami, si tozi vura nia gami koa gamu; pude boka somana tagoa gamu koa gami sa tinoia binaere te Tamasa sa Tamada, meke se Zisu Karisito sa Tuna.

<sup>4</sup> Kuberia gami si hie, pude tava gorevura sa nada qinetuqetu.

### *Na Kalalasa sa Tamasa*

<sup>5</sup> Hie sa inavoso sapu avosia gami koa Sa meke korapa zama vura atu nia koa gamu: Kalalasa sa Tamasa; meke koa Sa si loke hinuporo hokara si koa.

<sup>6</sup> Be zama si gita sapu tagoa gita sa tinoia binaere koe Tamasa, gua, ba ene pa hinuporo si gita, si kokoha si gita koari nada zinama, na tinavete.

\* **1:1** Zn 1:1   \* **1:2** Zn 1:14

<sup>7</sup> Ba be koa pa kalalasa si gita, gua sapu na Kalalasa si Asa, si tiqe tagoa gita sa tinoa binaere koe Tamasa pa varikorapada. Meke sa eharana e Zisu sa Tuna, si va via gita koari doduru nada sinea.

<sup>8</sup> Be zama si gita sapu loke nada sinea si gita, gua, si va koha puleni gita mo teleda, meke lopu koa koa gita sa hinokara.

<sup>9</sup> Ba be helahelae ni gita sari nada sinea koe Tamasa, si kote taleosoni gita Sa, meke va via gita koari doduru nada tinavete kaleadi, sina ta ronuna meke tonoto si Asa.

<sup>10</sup> Be zama si gita sapu lopu hite tavete va sea si gita; gua, si va kokoha ia gita sa Tamasa, sapu zama guahe: “Sea beto sari doduru tie” gua, meke lopu tagoa gita sa Nana zinama.

## 2

### *Karisito sa Nada Tinokae*

<sup>1</sup> Kasa tuqu, kubere atu nia rau koa gamu sa leta hie, pude mi lopu tavete va sea si gamu. Ba be sea si keke tie, si koa nana se Zisu Karisito sa Tie Tonoto, meke sa nada tie vari karovae. Asa si zama poni gita koe Tamasa sa Tamada pude lavelave ni gita.

<sup>2</sup> Sina e Zisu Karisito tugo sa vinulasadi ri nada sinea koasa Nana minate. Meke lopu sari nada sinea mo teleda, ba gua tugo sari na sinea tana doduru tie pa kasia popoa.\*

<sup>3</sup> Be kopu ni gita sari na tinarae te Tamasa, si va sosodea gita sapu gilania gita si Asa.

\* **2:2** Rom 3:25

**4** Be zama si keke tie sapu gilania sa sa Tamasa, gua, ba lopu luli sa sari Nana tinarae, si na tie kokohana mo si asa, meke lopu tagoa sa sa hinokara.

**5** Ba asa sapu va tabea sa zinama te Tamasa, si gotogoto sa nana tataru koa Sa. Vasina tu kote gilana gunia gita sapu koa koa Sa si gita.

**6** Be zama si keke tie sapu koa koe Tamasa si asa, gua; si kaqu toa nia sa sa tinoa gugua sapu toa nia e Zisu Karisito.

### *Sa Tinarae Vaqura*

**7** Kasa qua baere ta tatarue mia, lopu na tinarae vaqura si kubere atu nia rau hie koa gamu, ba na tinarae koana mo, sapu ele avosia mo gamu tatasana sipu ta tarae sa Inavoso Leana koa gamu.\*

**8** Ba pa kaiqa ginugua, si na tinarae vaqurana si kubere atu nia rau hie, sina sa hinokarana sa si ta dogoro koe Karisito meke koa gamu. Ura korapa hola taloa sa hinuporo, meke ele kamo mae sa kalalasa hinokarana.

**9** Asa sapu zama sapu koa pa kalalasa si asa, gua, ba kukiti nia sa sa tasina koe Karisito si korapa koa pa hinuporo si asa.

**10** Asa sapu tataru nia sa tasina koe Karisito si koa pa kalalasa si asa, meke lopu kote va tubarae i sa sari kaiqa pa sinea.

**11** Ba asa sapu kukiti nia sa tasina koe Karisito, si na tie huporo meke ene pa hinuporo si asa, meke lopu gilania sa sa vasina pu korapa la ia gua sa, sina va behu i sa hinuporo sari matana.

\* **2:7** Zn 13:34

<sup>12</sup> Kasa tuqu koe Karisito, kubere atu koa gamu si rau, sina ele taleosae sari na mia sinea pa korapa pozana Karisito.

<sup>13</sup> Kasa Tamaqu koe Karisito, kubere atu koa gamu si rau, sina ele gilania gamu sa Tamasa sapu koa pa pinodalaena. Gamu kasa na tie vaqura koe Karisito, kubere atu si rau koa gamu, sina ele koa va mataqara si gamu koe Setani sapu sa ɣatina sa kinaleana.

<sup>14</sup> Gamu kasa na koburu te Karisito, kubere atu koa gamu si rau, sina gilania gamu sa Tamada pa Maŋauru. Gamu kasa na tamaqu koe Karisito, kubere atu koa gamu si rau, sina gamu tugo si ele gilania si Asa pu koa pa pinodalaena. Gamu kasa na tie vaqura koe Karisito, kubere atu koa gamu si rau, sina ɣiŋira si gamu pa mia rinanerane, meke toa pa bulomia gamu sa zinama te Tamasa, meke ele va kilasia gamu se Setani sapu sa ɣatina sa kinaleana.

<sup>15</sup> Mi lopu tataru nia sa kasia popoa meke sari na likakalae tanisa. Be tataru nia gamu sa kasia popoa, si lopu tataru nia gamu sa Tamasa.

<sup>16</sup> Ura sari doduru ginugua saripu tanisa kasia popoa si hire: Na inokoro sea tana tini, gua sapu dogori meke okoro ni na tie, meke sari doduru ginugua kaleadi saripu hoke va titie ni na tie. Loketona arini hire si maedi koe Tamasa, ba tanisa kasia popoa mo si arini.

<sup>17</sup> Sa kasia popoa meke sari na inokoro sea tanisa, meke sari doduru tinitona kaleadi vasina, saripu hoke okoro ni na tie, si korapa hola taloa. Ba asa sapu evaŋia sa hiniva tanisa Tamasa si kote toa hola niniae rane ka rane.

*Sa Kana te Karisito*

<sup>18</sup> Kasa tuqu koe Karisito, korapa nono mae sa vina betona sa totoso ta mutina. Ele avoso nia mia gamu sapu kote mae sa kana te Karisito\* gua. Kamahire ba ele koadia sari soku kana te Karisito, ke gilania gita sapu tata sa vina betona sa totoso.

<sup>19</sup> Sari na kana te Karisito hire si lopu somanadi hinokara koa gita. Gua asa ke ele taluarae koa gita si arini, sina be tie tadigita si arini, si kote koa hola koa gita si arini. Ba ele luara pani gita rini ke ta gilana sapu lopu tadigita si arini.

<sup>20</sup> Ba ele poni gamu Karisito sa Maqomaqo Hope, ke ele gilania gamu doduru sa hinokara.

<sup>21</sup> Kubere atu koa gamu si rau, lopu pa ginugua sapu na lopu gilania gamu sa hinokara, ba sina ele tumae nia mia gamu si asa, meke gilania mia tugo gamu sapu loke kinohakoha si vura mae koasa hinokara.

<sup>22</sup> Esei sa tie kokoha? Arini tugo sapu korodia va egoa sapu e Zisu tugo sa Karisito, sapu ta vizatana koe Tamasa. Arini tugo sari na kana te Karisito. Korodia va egoa rini sa Tuna meke sa Tamana.

<sup>23</sup> Asa sapu korona nia se Zisu sa Tuna Tamasa, si korona nia tugo sa sa Tamasa sa Tamana, ba asa sapu helahelae nia sa Tuna, si tagoa tugo sa sa Tamana.

<sup>24</sup> Mi kopu nia pa bulomia sa inavoso sapu ele avosia gamu pa pinodalaena. Be kopu nia gamu

\* **2:18** Sa kana te Karisito sapu kaqu mae sekesekai sari na tie pa vinabetona sa totoso ta mutina.

sa inavoso asa, si kote boka koa keke si gamu koasa Tuna meke sa Tamana.

<sup>25</sup> Meke hie tugo sa vina tatara sapu ele ponini gamu Sa, sapu "sa tinoa hola".

<sup>26</sup> Sari guguadi ri pu hiva turāna va sea gamu si kubere atu ni rau hie koa gamu.

<sup>27</sup> Ba sapu gamu, si ele ponini gamu Karisito sa Maqomaqona. Pa totoso korapa koa koa gamu sa Maqomaqona Sa, si lopu ta hivae si keke tie pude va tumatumae gamu. Sina sa Maqomaqo Hope tanisa telena si va tumatumae gamu sari doduru tīnītonā. Meke gua saripu va tumatumae gamu Sa si hinokara, lopu kokoha. Mi va tabea gua sapu va tumatumae gamu sa Maqomaqo Hope Tanisa, mamu koa soto koa Sa.

### *Sari na Koburu te Tamasa*

<sup>28</sup> Ego, gua asa, kasa tuqu koe Karisito, mi koa soto koe Zisu, pude pana pule mae Sa, si kote ranerane nada si gita, meke lopu kote kurekure na tome nia gita si Asa, pa rane sapu kote pule mae ia Sa.

<sup>29</sup> Gilania mia gamu sapu tonoto se Karisito, ke kote gilania mia tugo gamu sapu arini pu evanīa sa tīnōto si na koburu te Tamasa.

## 3

<sup>1</sup> Dotu, marilaena hola sa tataru te Tamasa koa gita. Nomana hola sa Nana tataru ke boka ta pozae na koburu Tanisa si gita, meke hinokara tugo. Gua asa ke lopu gilana gita rina tie tana kasia popoa si gita, meke lopu gilania tugo rini sa Tamasa.\*

---

\* <sup>3:1</sup> Zn 1:12

<sup>2</sup> Kasa qua baere ta tatarue mia, kamahire si na koburu te Tamasa si gita, ba gilania gita sapu pana vura pule mae se Karisito, si kote ta evaŋa gua puta tugo Asa si gita, sina kote dogoro sotia gita sa guguana Sa.

<sup>3</sup> Sa tie sapu aqa va ḥono nia sa pinule mae te Karisito si va via pule nia si asa, meke via kekeḥono gua tugo sa tinoa te Karisito.

<sup>4</sup> Asa sapu tavete va sea, si sekea sa sa Tinarae te Tamasa. Ura sa nada sinea si na sinekena sa Tinarae te Tamasa.

<sup>5</sup> Gilania mia gamu sapu mae nia Zisu Karisito si pude vulasa pani sari nada sinea, ba loke Nana sinea si Asa.\*

<sup>6</sup> Asa sapu koa keke koe Karisito, si lopu kote tavete va sea nono latu, ba asa sapu tavete va sea nono latu, si lopu hite dogoria na gilania sa se Zisu Karisito.

<sup>7</sup> Kasa tuqu koe Karisito, mi lopu ta turaŋa va sea koa keke tie. Asa sapu evania sa tinoŋoto si tonoto tugo si asa, meke tonoto gua puta tugo e Karisito.

<sup>8</sup> Asa sapu tavete va sea, si na tie te Setani<sup>d</sup> tugo si asa. Ura se Setani si ele sea mae tu pa pinodalaena. Sapu mae nia sa Tuna Tamasa, si pude huaria sa tinavete te Setani.

<sup>9</sup> Ura asa sapu ta podona koe Tamasa, si lopu kote tavete va sea nono latu. Sina sa tinoa te Tamasa si koa koa sa, meke sina ta podona koe Tamasa sa Tamana si asa, ke lopu tavete va sea nono latu si asa.

<sup>10</sup> Pa siran̄a hie si boka gilania gita sapu esei sa koburu te Tamasa, meke esei sa koburu te Setani.

---

\* <sup>3:5</sup> Zn 1:29

Asa sapu lopu lulia sa tinoñoto, meke lopu tataru nia sa tasina si lopu te Tamasa si asa.

*Koa Vari Tatarue*

<sup>11</sup> Hie tugo sa inavoso sapu ele avosia gamu pa pinodalaena: mada koa varivari tatarue si gita, gua.\*

<sup>12</sup> Mada lopu koa gua e Keni si gita. Asa si na tie te Setani, sapu va matea sa sa tasina soti, se Ebolo. Na vegua ke va matea sa? Koa gua sapu kaleana sa nana tinavete, ba se Ebolo si tavete va tonoto.\*

<sup>13</sup> Kasa tasiqo koe Karisito, be kukitini gamu rina tie pa kasia popoa si gamu, si mi lopu magasa nia.

<sup>14</sup> Gilania nada gita sapu ele hola nia gita sa minate, meke karovo la pa tinoa, sina tataru ni gita sari na turanada koe Karisito. Asa sapu lopu tataru ni sari na turanana koe Karisito, si tana minate si asa.\*

<sup>15</sup> Asa sapu kukiti nia sa tasina koe Karisito, si na tie variva mate tugo si asa. Meke gilania mia gamu sapu sa tie variva mate si lopu tagoa sa sa tinoa hola.

<sup>16</sup> Gua hie gilana gunia gita sa tataru: poni hobeni gita Karisito sa Nana tinoa. Meke garoda tugo gita si pude poni sari nada tinoa koari na turanada koe Karisito.

<sup>17</sup> Be keke tie si tago va leana nana likakalae, meke dogoria nana sa sapu koa malaña si keke turanana, ba lopu toka nia sa; vegua meke boka tataru nia sa sa Tamasa?

\* **3:11** Zn 13:34   \* **3:12** Zen 4:8   \* **3:14** Zn 5:24

<sup>18</sup> Ke gua asa kasa tuqu koe Karisito, mada lopu va vura ia sa tataru pa zinama mo, ba mada va gorevura ia pa tinavete, meke pa hinokara.

*Ranerane Nada pa Kenuna sa Tamasa*

<sup>19</sup> Gua asa meke kote gilania gita sapu koa pa hinokara si gita, meke pude gua asa si kote boka ranerane si gita pa kenuna sa Tamasa.

<sup>20</sup> Be sari buloda teleda si zutu puleni gita, si mada tumae nia sapu sa Tamasa si noma hola ni sari na buloda, meke gilani Sa sari doduru tinitoña.

<sup>21</sup> Ke gua asa, kasa qua baere, be lopu zutu gita rina buloda soti, si ranerane nada si gita pa kenuna sa Tamasa.

<sup>22</sup> Poni gita Tamasa gua saripu tepai gita koa Sa, sina va tabei gita sari Nana tinarae, meke taveti gita gua saripu variva qetu koa Sa.

<sup>23</sup> Sapu garunu nia sa Tamasa koa gita si guahe: pude mada va hinokaria gita se Zisu Karisito sa Tuna meke pude mada koa vari tatarue, gua puta tugo sapu ele garununi gita e Karisito.\*

<sup>24</sup> Asa sapu va tabei sari na Tinarae te Tamasa, si koa koe Tamasa si asa, meke sa Tamasa si koa koa sa. Guahe ke tumae nia gita sapu koa si Asa koa gita: Tumae nia gita sina koa koa gita sa Maqomaqo Hope sapu ponini gita Sa.

## 4

*Sa Maqomaqo Hope meke sa Maqomaqo Kokoha*

---

\* <sup>3:23</sup> Zn 13:34, 15:12,17

<sup>1</sup> Kasa turañaqu koe Karisito, mi lopu va hinokari saripu zama: Vagia rini sa Maqomaqo Hope, gua. Ba podeki tu, pude va sosodea sapu maena gua koe Tamasa sa Maqomaqo sapu vagia rini, ba lokari? Sina sokudi sari na poropita kokohadi saripu ele vura la pa doduru vasina.

<sup>2</sup> Gua meke kote gilania gamu sa Maqomaqona sa Tamasa, si guahe: doduru tie saripu tozi helahelae nia sapu Zisu Karisito si mae podo pa tini tie hinokara, si tagoa rini sa Maqomaqona sa Tamasa.

<sup>3</sup> Arini saripu va karia sapu mae podo pa tini tie hinokara se Zisu Karisito, si lopu tagoa rini sa Maqomaqona sa Tamasa. Sa maqomaqo sapu tagoa rini, si na maqomaqona sa kana te Karisito. Ele avoso nia mia gamu sapu kote mae sa kana te Karisito hie. Korapa koa nana pa kasia popoa kamahire si asa.

<sup>4</sup> Kasa tuqu, na tanisa Tamasa si gamu, meke ele va kilasi gamu sari na poropita kokohadi, sina Asa sapu koa koa gamu, si ɳinjira hola nia sa kana te Karisito sapu koa koasa kasia popoa.

<sup>5</sup> Sari na poropita kokoha sara, si tale zama mo pa kalina sa kasia popoa, meke avosi rina tie tanisa kasia popoa si arini, sina tanisa kasia popoa si arini.

<sup>6</sup> Ba gita si tanisa Tamasa. Asa sapu gilania sa Tamasa, si va avoso gita sa; ba asa sapu lopu te Tamasa, si korona va avoso mae koa gita. Vasina si boka va sosodea gita sa Maqomaqona sa hinokara, meke sa maqomaqona sa kinohakoha.

### *Tataru sa Tamasa*

**7** Kasa tasiq, mada koa vari tatarue, sina na tataru si maena gua koe Tamasa, meke sari na tie sapu koa varivari tatarue si na koburu te Tamasa, meke gilania rini sa Tamasa.

**8** Asa sapu lopu tataru si lopu gilania sa sa Tamasa, sina na tataru tugo sa Tamasa.

**9** Va dogoroni gita Tamasa sa Nana tataru totoso garunu gore mae nia Sa pa pepeso sa Tuna Ekei, pude tagoa gita sa tinoa sapu mae guana koa Sa.

**10** Meke guahe sa tataru: lopu sapu na tataru kenu nia gita sa Tamasa, ba sapu Asa tu tataru kenuni gita, ke garunu mae nia Sa sa Tuna pude na vinulasadi ri nada sinea koasa Nana minate.

**11** Kasa qua baere, be gua asa sa tataru te Tamasa koa gita, si mada koa varivari tatarue gua tugo asa si gita.

**12** Loke tie ele hite dogoria sa Tamasa, ba be koa varivari tatarue si gita, si koa koa gita sa Tamasa, meke sa Nana tataru si tava gorevura valeana pa nada tinoa.\*

**13** Gua asa ke gilana valeania gita sapu koa koe Tamasa si gita, meke koa koa gita si Asa, sina ele ponini gita Sa sa Maqomaqona.

**14** Meke ele dogoria na helahelae nia gami pa tie, sapu sa Tamasa si ele garunu gore mae nia sa Tuna, pude na Hinarupu tadi doduru tie pa kasia popoa.

**15** Asa sapu tozi helahelae nia sapu Zisu si na Tuna Tamasa, si koa koe Tamasa si asa, meke sa Tamasa si koa koa sa.

\* **4:12** Zn 1:18

<sup>16</sup> Gilania meke raŋea gita sa tataru te Tamasa koa gita. Na tataru tugo sa Tamasa, ke asa sapu koa ia tataru, si koa koe Tamasa si asa, meke koa koa sa sa Tamasa.

<sup>17</sup> Ele tava gorevura valeana sa tataru koa gita, pude boka raŋerane nada si gita pa rane vinaripitui, sina sari nada tinoa pa pepeso hie, si gua tugo te Karisito.

<sup>18</sup> Na tataru si lopu matagutu. Sa tataru gotogotona si hadu pania sa minatagutu. Asa sapu matagutu, si lopu gotogoto sa nana tataru, sina na matagutu nia sa sa vina kilasa.

<sup>19</sup> Koa tataru si gita, sina tataru kenuni gita sa Tamasa.

<sup>20</sup> Be zama si keke tie, "Tataru nia rau sa Tamasa," gua; meke kukiti nia sa sa tasina, si na tie kokohana tugo si asa. Sina vegua meke boka tataru nia sa sa Tamasa sapu lopu hite dogoria sa, be lopu tataru nia sa sa tasina sapu boka dogoria sa?

<sup>21</sup> Hie tugo sa tinarae sapu ele ponini gita Karisito: Asa sapu tataru nia sa Tamasa, si mani tataru nia tugo sa tasina.

## 5

### *Sa Nada Minataqara koasa Kinaleana pa Kasia Popoa*

<sup>1</sup> Asa sapu va hinokaria sapu e Zisu tugo sa Karisito, si ta podoe koburu te Tamasa si asa. Meke asa sapu tataru nia sa Tamasa sa Tamana, si tataru nia tugo sa sa Tuna Tamasa.

<sup>2</sup> Gua asa ke gilania gita sapu be tataru ni gita sari na koburu te Tamasa, si tataru nia tugo gita sa Tamasa, meke va tabei gita sari Nana Tinarae.

<sup>3</sup> Pude tataru nia sa Tamasa ginguana, si pude va tabei sari Nana tinarae, meke sari Nana tinarae si lopu tasuna sisigiti koa gita.\*

<sup>4</sup> Ura arini pu ta podoe koe Tamasa pude koburu Tanisa, si boka va kilasia sa kinaleana pa kasia popoa. Meke sa nada minataqara koasa kinaleana pa kasia popoa si sa nada rinañerane koe Karisito.

<sup>5</sup> Loke tie si boka va kilasia sa kinaleana pa kasia popoa, ba asa mo sapu va hinokaria sapu Zisu si na Tuna Tamasa.

### *Sa Vina Sosodena e Zisu Karisito*

<sup>6</sup> E Zisu tugo hie sapu mae pa pinapitaiso pa kolo, meke pa eharana koasa Nana minate. Lopu pa pinapitaiso eke mo pa kolo si mae ia Sa, ba pa eharana tugo koasa Nana minate. Meke sa Maqomaqo Hope telena si va sosodea sapu hinokara sa ginugua hie, sina hinokara sa Maqomaqo Hope.

<sup>7</sup> Ka ɳeta sari na vina sosodena sa Tuna.

<sup>8</sup> Sa Maqomaqo Hope, sa kolo pa pinapitaiso, meke sa eharana Sa pa Nana minate. Meke sari ka ɳeta hire si kekeɳono mo sari na dia vina sosode.

<sup>9</sup> Va hinokaria gita sa vina sosode tadi na tie, ba sa vina sosode te Tamasa si ɳinjira hola nia sapu tadi na tie. Sa vina sosode sapu ele ponini gita sa Tamasa, si na guguana sa Tuna.

\* **5:3** Zn 14:15

**10** Asa sapu va hinokaria sapu Zisu sina Tuna Tamasa, si tagoa sa sa vina sosode hie pa bulona. Ba asa sapu lopu va hinokaria, si zutu nia tie kokoha sa sa Tamasa, koasa guguana sa Tuna.

**11** Meke hie tugo sa vina sosode, sapu ele poni nia Tamasa koa gita sa tinoa hola. Meke sa tinoa hola hie si koa pa korapana sa Tuna.\*

**12** Asa sapu tagoa sa Tuna, si tagoa sa sa tinoa hola. Ba asa sapu lopu tagoa sa Tuna, si lopu tagoa sa sa tinoa hola.

**13** Kubere atu nia rau si hie koa gamu pu va hinokaria sa Tuna Tamasa, pude boka gilana valeania gamu sapu ele tagoa gamu sa tinoa hola.

**14** Ranerañe valeana nada, meke lopu matagutu si gita pa kenuna sa Tamasa. Sina gilana valeania gita sapu avoso gita Sa totoso tepa ia gita si keketonā sapu goto la pa Nana hiniva.

**15** Totoso tepa si gita si avoso gita Sa. Gua asa ke gilania gita sapu kote vagia gita gua sapu tepa ia gita koa Sa.

**16** Be dogoria goi si keke tasimu koe Karisito sapu evanja si keke sinea sapu lopu kote boka turanā la nia si asa pa minate, si mu varavara nia, meke kote ponía Tamasa sa tinoa koa sa. Hie si koa sa mo sapu evaní sari na sinea sapu lopu kote turanā la nia si asa pa minate. Ba koa nana sa sinea sapu variva mate\*. Sa sinea asa si lopu tozini gamu rau pude varavara nia.

**17** Doduru tinavete kaleadi si na sinea beto mo, ba koa dia si kaiqa sinea saripu lopu turanā la tie

---

\* **5:11** Zn 3:36      \* **5:16** Sa sinea sapu turanā la nia sa tie pa minate si lopu bakala.

pa minate.

<sup>18</sup> Gilania gita sapu loke koburu te Tamasa si tavete nono la ia sa sinea, sina se Zisu Karisito sa Tuna Tamasa si kopu nia si asa pude lopu nono la pa sinea. Meke se Setani si lopu kote boka va kaleania si asa.

<sup>19</sup> Ba gilania gita sapu gita si na koburu te Tamasa, meke sapu doduruna sa kasia popoa si koa pa niniranira te Setani.

<sup>20</sup> Gilania gita sapu ele mae sa Tuna Tamasa, meke ele ponini gita Sa sa ginilagilana pude boka gilania gita sa Tamasa hinokara, meke pude koa keke si gita koasa Tamasa hinokara pa korapana sa Tuna, sapu se Zisu Karisito. Meke asa tugo sa Tamasa hinokara, meke sa tinoa hola.

<sup>21</sup> Kasa tuqu, mi kopu puleni gamu koari na tamasa kokohadi!

**Buka Hope  
The Holy Bible in the Roviana language of the  
Solomon Islands  
Buk Baibel long langguis Roviana long Solomon  
Islands**

copyright © 2016 Wycliffe Bible Translators, Inc.

Language: Roviana

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-06

---

PDF generated using Haiola and XeLaTeX on 18 Apr 2025 from source files dated 13 Dec 2023

2a5324ac-61e8-5e5b-b226-f3d15850d7c5